

Umsögn dómnefndar

samkvæmt III. kafla laga nr. 50/2016 um dómstóla

um umsækjendur um tvö embætti héraðsdómara með fyrstu starfsstöð, annars vegar við Héraðsdóm Reykjavíkur og hins vegar Héraðsdóm Reykjanes, sem auglýst voru laus til umsóknar í Lögbirtingablaði 9. júlí 2021

Reykjavík, 15. september 2021

EFNISYFIRLIT

1. Umsækjendur	3
2. Sjónarmið sem nefndin byggir mat sitt á	3
3. Um málsmeðferð dómnefndar	6
4. Almennar upplýsingar um umsækjendur	7
5. Mat á hæfni umsækjenda	13
5.1. Menntun og framhaldsmenntun	13
5.1.1. Menntun og framhaldsmenntun – samanburður	14
5.2. Reynsla af dómstörfum.....	14
5.2.1. Reynsla af dómstörfum – samanburður	15
5.3. Reynsla af lögmanns- og málflutningsstörfum.....	15
5.3.1. Reynsla af lögmanns- og málflutningsstörfum – samanburður	17
5.4. Reynsla af stjórnarsýslustörfum.....	17
5.4.1. Reynsla af stjórnarsýslustörfum – samanburður	19
5.5. Reynsla af fræðistörfum o.fl.	19
5.5.1. Kennsla á háskólastigi og önnur akademísk störf	19
5.5.1.1. Kennsla á háskólastigi og önnur akademísk störf – samanburður	20
5.5.2. Útgefnar greinar og bækur, ritstjórn o.fl.	20
5.5.2.1. Útgefnar greinar og bækur, ritstjórn o.fl. – samanburður	21
5.6. Reynsla af stjórnun	22
5.6.1. Reynsla af stjórnun – samanburður	23
5.7. Reynsla af öðrum störfum sem nýtast dómaraefni o.fl.	23
5.7.1. Reynsla af öðrum störfum sem nýtast dómaraefni o.fl. – samanburður	24
5.8. Almenn starfshæfni og andlegt atgervi.....	25
5.9. Sérstök starfshæfni	25
5.9.1. Að umsækjandi hafi einkamála- og sakamálaréttarfar á valdi sínu.....	25

5.9.2. Að umsækjandi geti farið að fyrirmælum laga um samningu dóma, ritað þá á góðu máli og fært viðhlítandi rök fyrir dómsniðurstöðu.....	26
5.9.3. Að umsækjandi geti stjórnað þinghöldum af röggsemi og sanngirni og afgreitt þau mál sem honum eru fengin bæði fljótt og af öryggi.....	27
6. Niðurstaða dómnefndar	27

1. Umsækjendur

Með bréfi 10. ágúst 2021 fór dómsmálaráðuneytið þess á leit við dómnefnd samkvæmt III. kafla laga nr. 50/2016 um dómstóla að hún léti í té umsögn um hæfni umsækjenda um embætti tveggja héraðsdómara, annars vegar með fyrsta starfsvettvang hjá Héraðsdómi Reykjavíkur og hins vegar með fyrsta starfsvettvang hjá Héraðsdómi Reykjaness. Embættin voru auglýst laus til umsóknar 9. júlí 2021 í Lögbirtingablaði.

Eftirtalin sóttu um embætti héraðsdómara með fyrsta starfsvettvang hjá Héraðsdómi Reykjavíkur: Björn Þorvaldsson saksóknari, Bryndís Guðmundsdóttir lögmaður, Margrét Gunnlaugsdóttir lögmaður, María Thejll lögmaður, Nanna Magnadóttir formaður úrskurðarnefndar umhverfis- og auðlindamála, Sigríður Rut Júlíusdóttir lögmaður, Sigurður Jónsson lögmaður, Súsanna Björg Fróðadóttir aðstoðarsaksóknari og Valborg Steingrimsdóttir sviðsstjóri.

Allir framangreindir umsækjendur sóttu jafnframt um embætti héraðsdómara með fyrsta starfsvettvang hjá Héraðsdómi Reykjaness að Sigríði Rut undanskilinni.

Björn Þorvaldsson dró umsókn sína til baka eftir að bréf ráðuneytisins barst nefndinni.

Samkvæmt 3. gr. reglna nr. 970/2020 um störf dómnefndar lætur dómsmálaráðherra staðreyna að umsækjendur uppfylli öll hin almennu hæfisskilyrði embættanna sem auglýst hafa verið laus til umsóknar. Niðurstaða ráðuneytis dómsmála var sú að umsækjendur uppfylltu allir þau skilyrði.

Umsögn dómnefndar fer hér á eftir.

2. Sjónarmið sem nefndin byggir mat sitt á

Samkvæmt 1. mgr. 12. gr. laga nr. 50/2016 skal dómnefnd láta ráðherra í té skriflega og rökstudda umsögn um umsækjendur um embætti dómara. Samkvæmt lögnum skal í umsögn dómnefndar tekin afstaða til þess hvaða umsækjandi sé hæfastur til að hljóta embættið, en heimilt er að setja tvo eða fleiri umsækjendur jafna.

Þágildandi lögum nr. 15/1998 um dómstóla var breytt með lögum nr. 45/2010. Í athugasemdum við þá málsgrein síðargreindu laganna, er varð að 2. mgr. 4. gr. a laga nr. 15/1998, sbr. nú 1. mgr. 12. gr. laga nr. 50/2016, segir m.a. svo: „Við mat á

hæfni dómaraefna er til margra atriða að líta, svo sem starfsreynslu á sviði lögfræði, hvort heldur hún er á sviði dómstarfa, málflytninga, annarra lögmannsstarfa, fræðistarfa eða innan stjórnáskrár, en almennt verður umsækjandi að hafa til að bera almenna og víðtæka lögfræðilega menntun og þekkingu. Rétt er einnig að líta til aukastarfa umsækjanda, svo sem til setu í úrskurðarnefndum eða annarra skyldra starfa sem nýtast dómaraefni. Almennt verður að telja umsækjanda til tekna að hafa yfir að búa fjölbreyttri starfsreynslu, þótt meta verði það hverju sinni. Dómnefndinni er einnig rétt að líta til og að leita sérstaklega eftir umsögnum um störf umsækjanda og þess hvort hann sé skilvirkur í störfum sínum og vinnusamur, hvort hann hafi til að bera hæfni til að skilja aðalatriði frá aukaatriðum og setja álit sitt fram á skiljanlegan hátt, bæði munnlega og skriflega. Er í því skyni unnt að líta til fræðiritna, reynslu umsækjanda af málflytningi eða þeirra dóma sem umsækjandi kann að hafa samið. Umsækjandi um dómaraembætti verður enn fremur að geta átt góð samskipti við aðra.“

Í lok 1. mgr. 12. gr. laga nr. 50/2016 kemur fram að ráðherra setji að öðru leyti nánari reglur um störf dómnefndar. Dómsmálaráðherra hefur sett reglur nr. 970/2020 um störf dómnefndar sem fjallar um hæfni umsækjenda um dómaraembætti, en þær komu í stað eldri reglna um sama efni, nr. 620/2010. Í 4. gr. hinna nýju reglna er á sama hátt og í 4. gr. þeirra eldri fjallað um sjónarmið, sem nefndin skal byggja mat sitt á, og segir þar svo:

„4. gr.

Sjónarmið sem mat dómnefndar skal byggt á.

Í umsögn dómnefndar skal tekin afstaða til þess hvaða umsækjandi eða umsækjendur séu hæfastir til þess að hljóta umrætt dómaraembætti. Dómnefnd skal gæta þess við mat sitt að samræmis sé gætt þannig að jafnræði sé í heiðri haft. Niðurstaðan skal byggð á heildstæðu mati á grundvelli málefnalegra sjónarmiða og skal þar byggt á verðleikum umsækjenda með hliðsjón af menntun og reynslu, ráðvæðni, hæfni og skilvirkni í starfi, eins og nánar greinir m.a. hér á eftir:

1. *Menntun, starfsferill og fræðileg þekking.* Við mat á menntun, starfsferli og fræðilegri þekkingu skal dómnefndin miða við að æskilegt sé að umsækjandi hafi fjölbreytta starfsreynslu á sviði lögfræðinnar, s.s. reynslu af dómstörfum, málflytningi

eða öðrum lögmannsstörfum, störfum innan stjórnarsýslunnar eða fræðistörfum. Miðað skal við að umsækjandi hafi til að bera almenna og viðtæka lögfræðilega þekkingu og menntun. Þá skal litið til þess hvort umsækjandi hefur stundað framhaldsnám.

2. *Aukastörf og félagsstörf.* Dómnefnd ber einnig að líta til aukastarfa umsækjanda, svo sem til setu í úrskurðarnefndum eða annarra skyldra starfa sem nýtast dómaraefni. Loks er heimilt að líta til viðtækrar þátttöku í félagsstarfi.

3. *Almenn starfshæfni.* Við mat á almennri starfshæfni skal litið til þess hvort umsækjandi hafi sýnt sjálfstæði, óhlutdrægni, frumkvæði og skilvirkni í starfi og hvort hann eigi auðvelt með að skilja aðalatriði frá aukaatriðum. Æskilegt er að hann hafi reynslu af stjórnun. Umsækjandi skal hafa góða þekkingu á íslensku máli og eiga auðvelt með að tjá sig í ræðu og riti.

4. *Sérstök starfshæfni.* Mikilvægt er að umsækjandi hafi einkamála- og sakamála-réttarfar á valdi sínu og geti farið að fyrirmælum laga um samningu dóma og ritað þá á góðu máli. Hann verður að geta stjórnað þinghöldum af röggsemi og sanngirni og afgreitt þau mál sem honum eru fengin, bæði fljótt og af öryggi.

5. *Andlegt atgerði.* Umsækjandi þarf að eiga auðvelt með mannleg samskipti, bæði við samstarfsmenn og þá sem erindi eiga við hann. Gerð er krafa um að af umsækjanda fari gott orð bæði í fyrri störfum og utan starfa og að reglusemi hans sé í engu ábótavant.“

Í almennum athugasemdum við frumvarp það, er varð að lögum nr. 45/2010 um breytingu á lögum nr. 15/1998, er áréttað að í öðrum lögum sé einnig að finna ákvæði sem taka verður tillit til við skipun dómara, svo sem í stjórnarsýslulögum nr. 37/1993, lögum nr. 10/2008 um jafna stöðu og jafnan rétt kvenna og karla og lögum nr. 70/1996 um réttindi og skyldur starfsmanna ríkisins. Ennfremur er þar minnt á að í tilmælum ráðherranefndar Evrópuráðsins nr. R(94)12 frá 13. október 1994 um sjálfstæði, skilvirkni og hlutverk dómenda (On the Independence, Efficiency and Role of Judges) kemur fram að allar ákvarðanir um skipun og starfsframa dómara skuli byggðar á hlutlægum sjónarmiðum og byggjast á verðleikum, með hliðsjón af hæfi, ráðvendni, hæfni og skilvirkni í starfi. Upphafsaákvæði 1. mgr. 4. gr. reglna nr. 970/2020 eru byggð á þessum tilmælum.

Dómnefnd hefur áður fjallað um í umsögnum sínum hvaða merkingu beri að leggja í þau ummæli 1. töluliðar 1. mgr. 4. gr. reglnanna „að æskilegt sé að umsækjandi hafi fjölbreytta starfsreynslu“ og tekið fram að þetta matsviðmið sé ekki einfalt í meðförum. Einnig að fjölbreytt starfsreynsla umsækjanda geti aukið lögfræðilega þekkingu hans, en slíkt sé þó ekki endilega raunin. Sú ályktun hefur verið dregin af athugasemdum með frumvarpinu, er varð að lögum nr. 45/2010, að megináhersla sé þar lögð á lögfræðilega þekkingu umsækjandans. Með fjölbreyttri starfsreynslu sé átt við fjölbreytileika starfa, sem umsækjendur hafa sinnt, en ekki síður hve verkefni, sem þeir hafa fengist við, séu fjölbreytileg í þeim skilningi að þeir hafi reynslu af því að beita réttarreglum á ólíkum sviðum lögfræði. Þá skiptir lögfræðileg þekking umsækjanda ekki máli, ein og sér, þegar mat er lagt á hæfni hans til að gegna embætti dómara í samanburði við aðra umsækjendur, heldur er einnig nauðsynlegt, eftir því sem tók eru á, að meta færni hans til að nýta þá þekkingu við úrlausn dómsmála.

3. Um málsmeðferð dómnefndar

Við meðferð máls þessa hefur Helga Melkorka Óttarsdóttir vikið sæti úr dómnefnd vegna vanhæfis á grundvelli 3. gr. stjórnslulaga og varamaður hennar, Sigríður Þorgeirsdóttir, tekið sæti í hennar stað. Fyrir sátu í nefndinni Eiríkur Tómasson, formaður, Kristín Benediktsdóttir, Óskar Sigurðsson og Ragnheiður Harðardóttir. Hinn 11. ágúst 2021 ritaði nefndin umsækjendum tölvubréf og óskaði eftir því að þeir gerðu athugasemdir við sérstakt hæfi nefndarmanna teldu þeir einhverjar vanhæfisástæður fyrir hendi. Ekki komu fram athugasemdir við sérstakt hæfi þeirra.

Fyrsti fundur dómnefndar var haldinn 11. ágúst 2021. Samkvæmt 10. gr. reglna nr. 970/2020 reiknast sex vikna afgreiðslufrestur nefndarinnar frá þeim degi, en þar er jafnframt tekið fram að sá frestur geti þó orðið lengri ef sérstakar ástæður valda því, svo sem mikill fjöldi umsækjenda o.þ.h.

Í framangreindri auglýsingu frá 9. júlí 2021 var m.a. áskilið að fram kæmu í umsóknum um dómaraembættin upplýsingar um tvo fyrrverandi eða núverandi samstarfsmenn eða yfirmenn sem gætu veitt dómnefnd bæði munnlega og skriflega upplýsingar um störf og samstarfshæfni hlutaðeigandi umsækjanda. Á grundvelli 5.

mgr. 5. gr. reglna nr. 970/2020 sendi dómnefnd spurningalista til þeirra sem umsækjendur höfðu gefið upp sem umsagnaraðila. Umsækjendunum var síðan veitt færi á að tjá sig um svör þeirra og hafði nefndin hliðsjón af þessum umsögnum við endanlegt mat sitt, svo sem nánar verður vikið að í kafla 5.8. hér á eftir.

Dómnefnd átti viðtöl við umsækjendur 1. og 3. september 2021.

Þess skal getið að hæfni sjö umsækjenda, Margrétar Gunnlaugsdóttur, Maríu Thejll, Nönnu Magnadóttur, Sigurðar Jónssonar, Sigríðar Rutar Júlíusdóttur, Súsönnu Bjargar Fróðadóttur og Valborgar Steingrimsdóttur, hefur nýlega verið metin af dómnefnd í tilefni af umsóknum þeirra um embætti héraðsdómara, sbr. umsagnir 20. júlí og 21. desember 2020 og 13. júlí 2021.

Samkvæmt 8. gr. reglna nr. 970/2020 voru umsækjendum send drög að umsögn dómnefndar með tölvubréfum 8. september 2021, þar sem þeim var gefinn kostur á að gera athugasemdir við þau til 13. sama mánaðar. Þess var sérstaklega farið á leit í bréfinu að fram kæmi svo fljótt sem kostur væri hvort umsækjendur hygðust gera athugasemdir og þær yrðu þá sendar sem fyrst. Athugasemdir bárust frá fjórum umsækjendum og voru gerðar minni háttar breytingar á drögnum með tilliti til þeirra án þess að niðurstaða umsagnarinnar breyttist.

4. Almennar upplýsingar um umsækjendur

Hér á eftir verður gerð grein fyrir menntun og reynslu umsækjenda, en 5. kafli hefur að geyma mat dómnefndar á hæfni umsækjenda og viðmið á grundvelli þeirra meginsjónarmiða sem reifuð voru í 2. kafla. Upplýsingarnar í þessum köflum eru fyrst og fremst byggðar á umsóknum umsækjendanna. Ekki er greint frá öllu því, sem þeir hafa talið þar upp, heldur getið helstu starfa og viðfangsefna er þeir hafa sinnt, auk þess sem leitast hefur verið við að gæta samræmis þeirra á milli þegar gerð er grein fyrir þessum atriðum.

Bryndís Guðmundsdóttir er fædd 22. apríl 1974 og er því 47 ára. Hún lauk embættisprófi í lögfræði frá Háskóla Íslands í febrúar 2000 og síðan meistaraþrófi (MBA) í viðskiptafræði og stjórnun frá Háskólanum í Reykjavík í maí 2008. Þá hefur hún sótt mörg námskeið í lögfræði. Hún öðlaðist málflutningsréttindi sem héraðs-dómslögmaður árið 2001 og sem hæstaréttarlögmaður 2013. Að loknu laganámi

starfaði umsækjandinn sem fulltrúi í sífja- og skiptadeild sýslumannsins í Reykjavík til 2002. Frá þeim tíma hefur hún starfað á lögmannsstofu, fyrst sem lögmaður en frá árinu 2008 sem meðeigandi stofunnar. Hún var stundakennari í skaðabótarétti við Háskólann á Bifröst 2018-2019. Af öðrum störfum má nefna að hún var alþjóðlegur dómari í áhaldafimleikum kvenna 1993-2005 og sat í laganefnd Fimleikasambands Íslands í nokkur ár sem og í tækninefnd kvenna í áhaldafimleikum um árabíl.

Margrét Gunnlaugsdóttir er fædd 7. maí 1961 og er því 60 ára. Hún lauk embættisprófi í lögfræði frá Háskóla Íslands í júní 1992 og diplómaprófi á sviði rekstrar og viðskipta frá Endurmenntunarstofnun Háskóla Íslands 1999. Í febrúar 2019 lauk hún meistaraprófi (LL.M) í alþjóðlegum og evrópskum viðskiptarétti frá Ludwig-Maximilians háskólanum í München. Þá hefur hún sótt mörg námskeið í lögfræði. Hún öðlaðist málflutningsréttindi sem héraðsdómslögmaður árið 2001 og sem hæstaréttarlögmaður 2010. Að loknu laganámi starfaði umsækjandinn sem sérfræðingur hjá dóms- og kirkjumálaráðuneytinu en frá 1993 til 1998 starfaði hún sem sérfræðingur á tekju- og lagaskrifstofu fjármálaráðuneytisins. Frá 2000 til 2003 starfaði hún sem sérfræðingur hjá embætti Tollstjórans í Reykjavík en hóf að því loknu störf sem lögmaður á lögmannsstofu. Þar starfaði hún þar til hún stofnaði lögmannsstofu árið 2005 þar sem hún hefur frá þeim tíma verið meðeigandi. Frá hausti 2017 til mars 2019 var hún í námsleyfi vegna meistaránáms. Hún sat í bráðabirgðastjórn Sparisjóðs Mýrasýslu árin 2009-2010 og í úrskurðarnefnd félagsþjónustu- og húsnæðismála árin 2010-2013. Frá 2006 hefur hún verið í teymi lögmannna sem sinnir Neyðarmóttöku kynferðisbrota. Þá var hún í stjórn Félags kvenna í lögmennsku árin 2006-2010. Hún hefur þrívægis tekið að sér kennslu á námskeiðum hjá Lögmannafélagi Íslands og hefur verið prófdómari við Háskólann í Reykjavík.

María Thejll er fædd 18. júlí 1964 og er því 57 ára. Hún lauk embættisprófi í lögfræði frá Háskóla Íslands í október 1990 og stundaði nám í rekstrar- og viðskiptafræði við Endurmenntunarstofnun Háskóla Íslands þrjár annir árin 1999 til 2000. Hún hefur sótt mörg námskeið í lögfræði. Hún öðlaðist málflutningsréttindi sem héraðsdómslögmaður árið 1992 og sem hæstaréttarlögmaður árið 2017. Að loknu lagaprófi starfaði hún sem fulltrúi á lögmannsstofu til ársins 1992 en var síðar lögmaður á sömu stofu til ársins 1998. Á árunum 1998-2000 var hún einn af

meðeigendum stofunnar og starfaði þá jafnframt sem einn af lögmönnum Neyðarmóttöku kynferðisbrota. Hún var skrifstofustjóri hjá samgönguráðuneytinu árin 2000 til 2002 og forstöðumaður Lagastofnunar Háskóla Íslands 2003 til 2016, jafnframt því að vera forstöðumaður Mannréttindastofnunar Háskóla Íslands 2005 til 2016, skrifstofustjóri lagadeildar Háskóla Íslands 2005 til 2007 og framkvæmdastjóri Rannsóknastofnunar Ármanns Snævarr 2015 til 2016. Hún hefur verið lögmaður við embætti ríkislögmanns síðan í janúar 2017 og flutt þar fjölda mála á öllum dómstigum. Umsækjandinn var stundakennari á sviði fjármunaréttar í Kröfurétti I árin 2008 til 2016. Hún starfaði að ýmsum útgáfum og fræðistörfum í starfi sínu fyrir Lagastofnun Háskóla Íslands, var m.a. ritstjóri ritraðar Lagastofnunar með fræðilegum ritgerðum um lögfræðileg efni frá 2011 til 2016. Af öðrum störfum má nefna að hún var formaður eftirlitsnefndar með fjárhagslegri endurskipulagningu heimila og fyrirtækja samkvæmt lögum nr. 107/2009 árin 2009 til 2012 og vann við úttekt á framkvæmd gjaldeyriseftirlits Seðlabanka Íslands árið 2016.

Nanna Magnadóttir er fædd 10. mars 1973 og er því 48 ára. Hún lauk embættisprófi í lögfræði frá Háskóla Íslands í júní 1998 og meistaraþrófi í alþjóðlegum mannréttindalögum frá Raoul Wallenberg stofnun Háskólans í Lundi árið 2004. Hún hefur sótt ýmis námskeið um lögfræðileg efni bæði hérlendis og erlendis. Hún öðlaðist málflutningsréttindi sem héraðsdómslögmaður 2001. Að loknu embættisprófi starfaði hún sumarlangt í þinglýsingardeild hjá sýslumanninum í Kópavogi. Í september 1998 varð hún aðstoðarmaður dómara við Héraðsdóm Reykjavíkur og gegndi því starfi fram í ágúst 2001, að undanskildum fjórum mánuðum sem hún starfaði fyrir dómstólaráð og átta mánuðum meðan hún var settur skrifstofustjóri dómstólsins. Frá september 2001 til ágúst 2002 starfaði hún sem lögfræðingur hjá umboðsmanni Alþingis. Í september 2003 hóf umsækjandinn störf sem aðstoðarmaður í fastanefnd Íslands hjá Evrópuráðinu og starfaði þar fram í maí 2004 er hún hóf störf sem lögfræðingur í deild Evrópuráðsins um fullnustu dóma Mannréttindadómstóls Evrópu. Frá janúar 2005 sinnti hún margvíslegum störfum á vegum Evrópuráðsins í Kósóvó og Sameinuðu þjóðanna á Balkanskaga. Frá október 2009 og fram í september 2013 starfaði hún sem aðalráðgjafi hjá Eystrasaltsráðinu í Stokkhólmi. Frá þeim tíma var hún sjálfstætt starfandi og tók m.a. að sér ýmis verkefni fyrir umboðsmann

Alþingis og Eyrstrasaltsráðið eða fram til 1. janúar 2014 þegar hún var skipuð forstöðumaður og formaður úrskurðarnefndar umhverfis- og auðlindamála. Hún hefur ritað eina óritrýnda grein sem birtist í lögfræðitímariti og flutt fræðaerindi. Í Lundi starfaði hún samhliða námi sem aðstoðarmaður prófessors og var meðritstjóri *Balticness*, tímarits Eyrstrasaltsráðsins, 2009-2010. Þá var hún prófdómari á munnlegum prófum í tveimur námskeiðum við Háskóla Íslands 2019. Umsækjandinn var sjálfboðaliði hjá Kvennaráðgjöfinni 1997-1999 og formaður vinnuhóps um heimasíðu fyrir héraðsdómstólana og dómstólaráð 2001. Árin 2014-2018 var hún í stjórn Félags Sameinuðu þjóðanna á Íslandi. Þá hefur hún átt hlut að undirbúningi lagasetningar og gerð ýmiss konar regluverks í störfum sínum, m.a. haft framsögu á ýmsum ráðstefnum og beitt sér fyrir endurskoðun verklagsreglna Eyrstrasaltsráðsins um þátttöku þess í verkefnum. Umsækjandinn gegndi nýlega formennsku í ráðgefandi hæfnisnefnd, með það hlutverk að fara yfir og leggja mat á umsóknir um embætti skrifstofustjóra á skrifstofu landgæða í umhverfis- og auðlindaráðuneytinu. Einnig hefur hún verið formaður og tekið þátt í fjölmörgum vinnuhópum sem starfsmaður Evrópuráðsins, UNIFEM og Eyrstrasaltsráðsins.

Sigríður Rut Júlíusdóttir er fædd 3. apríl 1975 og er því 46 ára. Hún lauk embættisprófi í lögfræði frá Háskóla Íslands í október 1999 og síðan meistaraprófi í lögum (LL.M) frá Stanford-háskóla í Bandaríkjunum 2011. Hún öðlaðist réttindi til málflutnings fyrir héraðsdómi á árinu 2000 og réttindi til málflutnings fyrir Hæstarétti 2007. Árin 1999-2002 starfaði hún fyrst sem fulltrúi og síðar lögmaður á tveimur lögmannsstofum. Árið 2002 stofnaði hún lögmannsstofu, ásamt öðrum, þar sem hún hefur frá þeim tíma verið meðeigandi. Umsækjandinn hefur sinnt stundakennslu við Háskólann í Reykjavík frá 2018 í Entertainment Law, komið að samningu prófa sem og haft umsjón með BA- og meistararitgerðum. Hún hefur verið prófdómari við meistaraprófsvarnir við lagadeild Háskóla Íslands jafnframt sem hún var prófdómari á meistarastigi við sama skóla í höfundarétti 2018 og 2020 og ofbeldisbrotum frá sjónarhóli kvennaréttar árið 2020. Árin 2014 og 2015 var hún stundakennari við lagadeild Háskólans á Bifröst. Hún kenndi námskeið við endurmenntunardeild Old Dominion University í Norfolk Virginíuríki í Bandaríkjunum 2009 og 2010. Hún hefur ritað tvær óritrýndar greinar um lögfræði, þar af aðra með öðrum höfundum, auk

ritrýnds bókarkafli. Einnig hefur hún skrifað tvær stuttar greinar sem birst hafa í Lögmannablaðinu. Þá hefur hún haldið fyrirlestra um lögfræðileg efni við ýmis tækifæri. Umsækjandinn hefur setið í stjórn Orkuveitu Reykjavíkur frá árinu 2016 og jafnframt verið formaður starfskjaranefndar Orkuveitunnar. Frá því ári hefur hún setið í stjórn og fulltrúaráði Innheimtustöðvar rétthafa sem starfar á grundvelli 11. gr. höfundalaga nr. 73/1972. Hún hefur setið í höfundaréttarnefnd og höfundaréttarráði frá 2006. Hún sat í laganefnd Lögmannafélags Íslands 2006-2008, nefnd á vegum umboðsmanns skuldara og Samtaka fjármálafyrirtækja 2012 og nefnd forsætisráðherra um úrbætur á löggjöf á sviði tjáningar-, fjölmiðla- og upplýsinga-frelsis 2018.

Sigurður Jónsson er fæddur 13. febrúar 1956 og er því 65 ára. Hann lauk embættisprófi í lögfræði frá Háskóla Íslands í júní 1983. Hann hefur sótt ýmis námskeið í lögfræði. Hann öðlaðist réttindi til málflutnings fyrir héraðsdómi á árinu 1989 og réttindi til málflutnings fyrir Hæstarétti 1997. Þá öðlaðist hann fasteigna-söluréttindi árið 1991. Að loknu lagaprófi hóf hann störf sem dómarafulltrúi hjá bæjarfógetanum og sýslumanninum á Akureyri og starfaði þar fram til ársins 1986 er hann hóf störf sem fulltrúi sýslumannsins í Árnessýslu. Á árinu 1987 var hann settur sýslumaður í Strandasýslu í sem næst einn og hálfan mánuð og árin 1988-1989 var hann starfsmannastjóri Sláturfélags Suðurlands á Selfossi. Á árunum 1989-1991 var hann aðstoðarmaður dóms- og kirkjumálaráðherra en að því loknu hóf hann rekstur eigin lögmannsstofu auk fasteignasölu fram til ársins 2002. Frá 2002 til 2007 annaðist hann rekstur eigin lögmannsstofu og fasteignasölu í Vestmannaeyjum. Frá 2007 til 2012 annaðist hann rekstur eigin lögmannsstofu á Selfossi en stofnaði síðan lögmannsstofu í Kópavogi ásamt öðrum og starfar þar í dag. Umsækjandinn var formaður yfirúttektarnefndar Árnessýslu árin 1986-1993 og sat í mörgum nefndum á vegum Stjórnarráðs Íslands á árunum 1989-1991. Hann var nefndarmaður í kvörtunarnefnd Félags fasteignasala árin 2003-2008, stjórnarformaður Eyvindartungu ehf. árin 2001-2010, stjórnarformaður í Landssamtökum raforkubænda á Íslandi árin 2005-2010 og hefur verið stjórnarmaður Landssamtaka landeigenda á Íslandi frá árinu 2009. Árið 2018 tók hann sæti í tveimur nefndum samkvæmt 93. gr. laga nr. 15/1998

um framkvæmd sveitarstjórnarkosninga. Hann hefur alloft verið dómkvaddur sem matsmaður, aðallega til að meta verðmæti fasteigna og gera arðskrár vegna veiði.

Súsanna Björg Fróðadóttir er fædd 25. desember 1971 og er því 49 ára. Hún lauk BA-prófi og síðan meistaraprófi í lögfræði frá Háskólanum í Reykjavík í janúar 2012. Árið 2018 lauk hún eins árs námskeiði um stjórnun lögreglurannsókna hjá Mennta- og starfsþróunarsetri lögreglunnar og hefur stundað nám í opinberri stjórnsýslu (MPA) við Háskóla Íslands. Hún öðlaðist réttindi sem héraðsdómslögmaður 2012. Að loknu lagaprófi starfaði hún sem fulltrúi og síðar lögmaður á lögmannsstofu til ársins 2013, en 2013-2014 var hún sjálfstætt starfandi lögmaður og meðeigandi að annarri lögmannsstofu. Frá árinu 2014 hefur hún starfað sem aðstoðarsaksóknari hjá embætti lögreglustjórans á Suðurnesjum. Umsækjandinn hefur um árabíl verið félagi í Soroptimistasambandi Íslands. Hún var formaður laganefndar sambandsins 2012-2016, varaformaður Keflavíkurklúbbs Soroptimista 2015-2017 og formaður klúbbsins 2017-2019. Umsækjandinn hefur frá árinu 2019 setið í framtíðarnefnd Reykjanesbæjar sem kjörin var af bæjarstjórn sveitarfélagsins.

Valborg Steingrimsdóttir er fædd 6. júní 1982 og er því 39 ára. Hún lauk BA-prófi og síðan meistaraprófi í lögfræði frá Háskóla Íslands í júní 2008, svo og meistaraprófi í lögum (LL.M) frá Berkeley-háskóla í Kaliforníu 2011. Hún hefur sótt ýmis námskeið á sviði lögfræði. Hún öðlaðist réttindi sem héraðsdómslögmaður í desember 2015. Að loknu laganámi starfaði hún sem lögfræðingur hjá Orkustofnun til ársins 2010, en í því starfi kom hún m.a. að leyfisveitingum á grundvelli raforkulaga og laga um eignarrétt íslenska ríkisins að auðlindum hafsbotnsins. Hún starfaði sem lögfræðingur fyrir stjórnlagaráð um tveggja mánaða skeið árið 2011 og á árunum 2011-2018 starfaði hún sem aðstoðarmaður dómara við Héraðsdóm Reykjavíkur. Árið 2018 hóf hún störf hjá Persónuvernd sem verkefnastjóri, en hefur frá því í júlí 2021 gegnt stöðu sviðsstjóra hjá stofnuninni. Hún vann tímabundið í leyfi frá störfum sínum hjá Persónuvernd sem aðstoðarmaður dómara við Landsrétt veturinn 2020-2021. Umsækjandinn hefur ritað tvær fræðigreinar, þar af er önnur ritrýnd grein um lögfræði, en hin þverfræðileg grein sem hún samdi ásamt tveimur öðrum. Einnig hefur hún haldið tvo fyrirlestra um lögfræðileg efni. Árið 2010 var hún stundakennari við Háskóla Íslands í námskeiðinu Natural Resources Law og árið 2011 var hún

stundakennari við sama skóla í námskeiðunum EC Enviromental Law og International Enviromental Law. Þá hefur umsækjandinn haldið fræðileg erindi á sviði orku- og auðlindamála og persónuverndar. Hún var ritari í stjórn Stéttarfélags lögfræðinga 2013-2017 og ritari í stjórn kammerkórsins Hljómeyki 2016-2017, fulltrúi Persónuverndar í ráðgefandi nefnd Evrópuráðsins um persónuvernd 2018-2019. Einnig hefur hún setið í sérfræðingahópi Evrópska persónuverndarráðsins sem fjallar um eftirfylgni, rafræna stjórnsýslu og heilbrigði.

5. Mat á hæfni umsækjenda

5.1. Menntun og framhaldsmenntun

Bryndís Guðmundsdóttir lauk embættisprófi í lögfræði frá Háskóla Íslands árið 2000 og meistaraprófi (MBA) í viðskiptafræði og stjórnun frá Háskólanum í Reykjavík 2008.

Margrét Gunnlaugsdóttir lauk embættisprófi í lögfræði frá Háskóla Íslands árið 1992 og diplómaprófi á sviði rekstrar og viðskipta 1999 frá Endurmenntunarstofnun sama skóla. Árið 2019 lauk hún meistaraprófi (LL.M) í alþjóðlegum og evrópskum viðskiptarétti frá Ludwig-Maximilians háskólanum í München.

María Thejll lauk embættisprófi í lögfræði frá Háskóla Íslands árið 1990 og stundaði nám á sviði rekstrar og viðskipta við Endurmenntunarstofnun sama skóla í þrjár annir 1999-2000.

Nanna Magnadóttir lauk embættisprófi í lögfræði frá Háskóla Íslands árið 1998 og meistaraprófi í alþjóðlegum mannréttindalögum frá Raoul Wallenberg stofnun Háskólans í Lundi 2004.

Sigríður Rut Júlíusdóttir lauk embættisprófi í lögfræði frá Háskóla Íslands árið 1999 og meistaraprófi í lögum (LL.M) með áherslu á hugverkarétt frá Stanford háskóla 2011.

Sigurður Jónsson lauk embættisprófi í lögfræði frá Háskóla Íslands árið 1983.

Súsanna Björg Fróðadóttir lauk meistaraprófi í lögfræði frá Háskólanum í Reykjavík árið 2011. Hún hefur lokið eins árs námskeiði um stjórnun lögreglu-

rannsóknna hjá Mennta- og starfsþróunarsetri lögreglunnar auk þess að hafa stundað nám í opinberri stjórnsýslu (MPA) við Háskóla Íslands og lokið þar nokkrum námskeiðum.

Valborg Steingrímsdóttir lauk meistaraprófi í lögfræði frá Háskóla Íslands árið 2008 og meistaraprófi í lögum (LL.M) með áherslu á aðferðafræði og rökfræði frá Berkeley háskóla 2011.

5.1.1. Menntun og framhaldsmenntun – samanburður

Að virtu því, sem að framan greinir, er það mat dómnefndar að *Margrét* standi fremst umsækjenda í þessum matsþætti, en hún hefur lokið meistaraprófi í lögum frá erlendum háskóla að loknu embættisprófi frá Háskóla Íslands auk diplómaprófs frá háskólastofnun í greinum, skyldum lögfræði. Á eftir henni fylgja *Nanna*, *Sigríður Rut* og *Valborg* sem lokið hafa meistaraprófi í lögum frá erlendum háskólum að loknu embættis- eða meistaraprófi frá HÍ. Síðan *Bryndís*, sem hefur auk embættisprófs lokið meistaranámi í grein, skyldri lögfræði, frá Háskólanum í Reykjavík. Þá *María* og á eftir henni *Súsanna Björg*. Loks *Sigurður* sem ekki hefur lagt stund á frekara nám en setið eins og aðrir umsækjendur ýmis önnur stutt lögfræðinámskeið að loknu fullnaðarnámi í lögfræði með embættis- eða meistaraprófi.

5.2. Reynsla af dómstörfum

Bryndís Guðmundsdóttir hefur ekki reynslu af dómstörfum.

Margrét Gunnlaugsdóttir hefur ekki reynslu af dómstörfum.

María Thejll hefur ekki reynslu af dómstörfum.

Nanna Magnadóttir var aðstoðarmaður héraðsdómara í samtals tvö ár.

Sigríður Rut Júlíusdóttir hefur ekki reynslu af dómstörfum.

Sigurður Jónsson starfaði sem dómarafulltrúi hjá bæjarfógetanum á Akureyri og sýslumanninum í Eyjafjarðarsýslu á árunum 1983-1986 og sýslumanninum í Árnes-sýslu 1986-1988. Einnig hefur hann margoft verið dómkvaddur sem matsmaður.

Súsanna Björg Fróðadóttir hefur ekki reynslu af dómstörfum.

Valborg Steingrimsdóttir hefur verið aðstoðarmaður dómara í nærfellt sjö ár samtals, þ.e. sem aðstoðarmaður héraðsdómara á árunum 2011-2018 og landsréttar-dómara 2020-2021.

5.2.1. *Reynsla af dómstörfum – samanburður*

Samkvæmt framansögðu hafa tveir umsækjenda reynslu af því að hafa verið aðstoðarmenn dómara og einn fulltrúi dómara áður en skilið var á milli umboðsvalds og dómsvalds í héraði. Við mat á hæfni þeirra að því er þennan þátt varðar er litið til þessara starfa umsækjendanna þótt þar vegi eðli máls samkvæmt þyngst fyrstu starfsárin og hafi mun minna vægi en störf sjálfstætt starfandi dómara, ekki síst ef langt er um liðið síðan þau voru innt af hendi. Þá kemur reynsla af því að hafa verið dómkvaddur matsmaður til álita hér, enda þótt henni verði á engan hátt jafnað til reynslu af því að hafa fengist við dómstörf.

Með skírskotun til þessa stendur *Valborg* fremst umsækjenda í þessum matsþætti þar sem hún hefur starfað sem aðstoðarmaður héraðsdómara og landsréttar-dómara í nærfellt sjö ár. Þar á eftir fylgja *Nanna* og *Sigurður*, en ekki verður gert upp á milli reynslu þeirra tveggja á þessu sviði. *Bryndís*, *Margrét*, *María*, *Sigríður Rut* og *Súsanna Björg* hafa sem fyrr segir ekki reynslu af dómstörfum.

5.3. *Reynsla af lögmanns- og málflutningsstörfum*

Bryndís Guðmundsdóttir öðlaðist réttindi til málflutnings fyrir héraðsdómi árið 2001 og fyrir Hæstarétti 2013. Frá því á árinu 2002 eða í um 19 ár hefur hún starfað óslitið sem lögmaður, þar af hefur hún frá 2008 verið sjálfstætt starfandi. Á þeim tíma hefur hún sinnt ýmsum málaflokkum, en á síðustu árum einbeitt sér að skaðabóta- og váttryggingarétti. Sem lögmaður hefur hún flutt margvísleg mál fyrir dómi, þó einkum á síðastgreindum tveimur réttarsviðum.

Margrét Gunnlaugsdóttir öðlaðist réttindi til málflutnings fyrir héraðsdómi árið 2001 og fyrir Hæstarétti 2010. Frá því á árinu 2003, ef frá er talið eins og hálfis árs tímabil þegar hún dvaldi erlendis í námsleyfi, eða í um 16 og hálf ár hefur hún starfað sem lögmaður, þar af hefur hún lengst af eða frá 1997 verið sjálfstætt starfandi. Á þessum tíma hefur hún flutt jöfnum höndum einkamál og sakamál fyrir dómi, en

sérsvið hennar sem lögmanns verið á sviði fjölskyldu- og sifjaréttar. Frá árinu 2006 hefur hún verið í teymi lögmannna sem sinnir Neyðarmóttöku kynferðisbrota.

María Thejll öðlaðist réttindi til málflutnings fyrir héraðsdómi árið 1992 og fyrir Hæstarétti 2017. Hún var fulltrúi á lögmannsstofu í um tveggja ára skeið 1990-1992. Á árabílinu 1992-2000 eða í um átta ár starfaði hún sem lögmaður á sömu stofu, þar af var hún sjálfstætt starfandi frá 1998. Á árunum 1998-2000 var hún í teymi lögmannna sem sinnti Neyðarmóttöku kynferðisbrota. Frá því í ársbyrjun 2017 eða í um fjögur og hálf ár hefur hún starfað sem lögmaður hjá embætti ríkislögmanns Lögmannsferill hennar nálgast því alls að vera 13 ár.

Nanna Magnadóttir öðlaðist réttindi til málflutnings fyrir héraðsdómi árið 2001, en hefur ekki reynslu af lögmanns- eða málflutningsstörfum.

Sigríður Rut Júlíusdóttir öðlaðist réttindi til málflutnings fyrir héraðsdómi árið 2000 og fyrir Hæstarétti 2007. Á árunum 1999-2000 starfaði hún sem fulltrúi og 2000-2002 sem lögmaður á lögmannsstofum. Frá árinu 2002 hefur hún starfað nær óslitið sem sjálfstætt starfandi lögmaður. Lögmannsferill hennar spannar því um 20 ár og hefur hún flutt á þeim tíma fjölbreytileg mál fyrir dómi, jafnt einkamál sem sakamál.

Sigurður Jónsson öðlaðist réttindi til málflutnings fyrir héraðsdómi árið 1989 og fyrir Hæstarétti 1997. Hann hefur verið sjálfstætt starfandi lögmaður frá 1991 eða í um 30 ár. Á þeim tíma hefur hann flutt mál af flestum réttarsviðum fyrir dómi, jafnt einkamál sem sakamál.

Súsanna Björg Fróðadóttir öðlaðist réttindi til málflutnings fyrir héraðsdómi árið 2012. Frá árinu 2011 starfaði hún fyrst sem fulltrúi, en síðar lögmaður á lögmannsstofu 2012-2013, en 2013-2014 var hún sjálfstætt starfandi lögmaður og meðeigandi að annarri lögmannsstofu. Í þeim störfum sinnti hún fyrst og fremst sakamálum sem verjandi ákærða eða réttargæslumaður brotapolá. Frá 2014 hefur hún verið aðstoðarsaksóknari hjá embætti lögreglustjóra og flutt fjölda sakamála í héraði. Málflutningsferill hennar sem lögmaður og sækjandi spannar því samtals um níu ár.

Valborg Steingrímsdóttir öðlaðist réttindi til málflutnings fyrir héraðsdómi árið 2015, en hefur ekki reynslu af lögmanns- eða málflutningsstörfum.

5.3.1. *Reynsla af lögmanns- og málflutningsstörfum – samanburður*

Sex umsækjendur hafa fengist í mislangan tíma við lögmanns- og málflutningsstörf. Við samanburð á hæfni þeirra vegna reynslu af þeim störfum er litið til þess hve langan feril þeir eiga að baki sem lögmennt, þ. á m. haft réttindi til flutnings mála fyrir æðra dómi, eða sem sækjendur í sakamálum. Einnig er horft til þess hversu mörg mál þeir hafa flutt og hvort störfin hafi verið fjölbreytileg þannig að þeir hafi fengist við mál á sem flestum réttarsviðum. Jafnframt skiptir máli hvort þeir hafi flutt vandasöm mál fyrir dómi, ekki síst Hæstarétti og Landsrétti, svo og hvort önnur mál, sem þeir hafa fengist við sem lögmennt, hafi verið yfirgripsmikil og flókin úrlausnar. Þá verður höfð hliðsjón af störfum umsækjenda á lögmannsstofum án þess að hafa lögmannsréttindi, en sú reynsla vegur þó tiltölulega lítið.

Samkvæmt öllu framansögðu stendur *Sigurður* fremstur umsækjenda í þessum matsþætti, en hann hefur starfað óslitið við fjölpætt lögmannsstörf í um 30 ár. Næst honum kemur *Sigríður Rut*, þá *Bryndís*, síðan *Margrét* og á eftir henni *María*, en allar eiga þær að baki langan en mismunandi fjölbreyttan lögmannsferil. Þar á eftir *Súsanna Björg* sem starfaði í skamman tíma sem lögmaður en hefur flutt sakamál fyrir héraðsdómi um nokkurra ára skeið. *Nanna* og *Valborg* hafa sem fyrr segir ekki fengist við lögmanns- eða málflutningsstörf.

5.4. *Reynsla af stjórnisýslustörfum*

Hér á eftir verða rakin helstu stjórnisýslustörf sem umsækjendur hafa haft með höndum.

Bryndís Guðmundsdóttir starfaði sem fulltrúi í sifja- og skiptadeild sýslumannsins í Reykjavík á árunum 2000-2002 eða í um tvö og hálf ár.

Margrét Gunnlaugsdóttir starfaði sem sérfræðingur hjá dóms- og kirkjumálaráðuneytinu á árunum 1992-1993, sem sérfræðingur á tekju- og lagaskrifstofu fjármálaráðuneytisins 1993-1998 og sem sérfræðingur hjá embætti Tollstjórans í Reykjavík 2000-2003 eða samtals í um níu ár. Þá átti hún sæti í úrskurðarnefnd félagsþjónustu- og húsnæðismála árin 2010-2013.

María Thejll starfaði sem skrifstofustjóri í samgönguráðuneytinu á árunum 2000-2002 eða um tveggja ára skeið. Hún var forstöðumaður Lagastofnunar Háskóla

Íslands árin 2003-2016 eða í nærfellt 14 ár, jafnframt því að gegna öðrum stjórnsýslustörfum innan skólans. Þá var hún formaður eftirlitsnefndar með fjárhagslegri endurskipulagningu heimila og fyrirtækja 2009-2012.

Nanna Magnadóttir var skrifstofustjóri Héraðsdóms Reykjavíkur í átta mánuði á árinu 2002. Hún starfaði sem lögfræðingur hjá umboðsmanni Alþingis 2002-2003. Á árunum 2003-2004 var hún aðstoðarmaður fastanefndar Íslands hjá Evrópuráðinu í Strassborg og starfaði síðan sem lögfræðingur hjá ráðinu, samtals í tæpt eitt og hálf tveimur árum. Árin 2005-2013 sinnti hún ýmsum stjórnsýslustörfum erlendis fyrir Evrópuráðið, Sameinuðu þjóðirnar og loks Eystrasaltsráðið, alls í um átta og hálf árs skeið. Frá því í byrjun árs 2014 eða í sjö og hálf tveimur árum hefur hún verið að aðalstarfi formaður og forstöðumaður úrskurðarnefndar umhverfis- og auðlindamála.

Sigríður Rut Júlíusdóttir hefur frá árinu 2006 eða í um 15 ár átt sæti í höfundaréttarnefnd, sem samkvæmt höfundalögum er ráðherra til ráðuneytis um höfundaréttarmál, auk höfundaréttarráði sem starfar á grundvelli sömu laga.

Sigurður Jónsson var fulltrúi bæjarfógeta og sýslumanns á árunum 1983-1986 og síðan sýslumannsfulltrúi 1986-1988. Hann var settur sýslumaður í einn og hálf tveimur mánuðum á árinu 1987. Þá var hann aðstoðarmaður dómsmálaráðherra um tveggja ára skeið 1989-1991 og sat í ýmsum nefndum á vegum Stjórnarráðsins í tengslum við það starf. Hann var formaður yfirúttektarnefndar 1986-1993. Þá átti hann sæti í nefndum til að úrskurða um gildi sveitarstjórnarkosninga í tveimur sveitarfélögum árið 2018.

Súsanna Björg Fróðadóttir hefur frá árinu 2014 eða í um sjö ára skeið verið aðstoðarsaksóknari hjá embætti sýslumannsins á Suðurnesjum.

Valborg Steingrimsdóttir starfaði sem lögfræðingur hjá Orkustofnun um tveggja ára skeið á árunum 2008-2010. Þá vann hún fyrir stjórnlagaráð í um tvo mánuði 2011. Á árunum 2018-2021 hefur hún starfað sem verkefnastjóri en síðar sviðsstjóri hjá Persónuvernd eða alls í rúm tvö ár. Samhliða því starfi hefur hún tekið þátt í evrópsku samstarfi á sviði persónuverndar, þ. á m. átti hún sæti í ráðgefandi nefnd Evrópuráðsins um persónuvernd 2018-2019.

5.4.1. *Reynsla af stjórnsýslustörfum – samanburður*

Í þessum þætti hæfnismats hafa allir umsækjendur greint frá störfum sem geta falið í sér reynslu af stjórnsýslustörfum. Í sumum tilvikum hafa þau störf, sem hér um ræðir, verið innt af hendi samhliða aðalstarfi og vega þar af leiðandi ekki eins þungt þegar hæfni á þessu sviði er metin. Við það mat skiptir ennfremur máli hvort störfin nýtist dómaraefni sérstaklega, sbr. 2. tölulið 4. gr. reglna nr. 970/2020, svo sem seta í úrskurðarnefndum eða vinna fyrir þær. Störf ákæranda og fulltrúa þeirra eru í eðli sínu stjórnsýslustörf, enda þótt taka verði tillit til þess að þau eru einnig fólgin í málflutningi fyrir dómi sem fellur undir þann matsþátt. Eins og endranær verður litið til framangreindra starfa og þeim gefið vægi eftir eðli sínu, umfangi og fjölbreytni. Jafnframt verður horft til lengdar starfstíma, en einnig þess hversu langt er síðan störfin voru innt af hendi.

Að þessu öllu virtu stendur *Nanna* fremst umsækjenda í þessum þætti mats. Skiptir þar mestu máli að hún hefur í sjö og hálf t. ár verið að aðalstarfi formaður og forstöðumaður úrskurðarnefndar umhverfis- og auðlindamála. Hefur hún í því starfi samið drög að niðurstöðu fjölmargra stjórnsýsluúrskurða nefndarinnar sem fæst við mikinn fjölda ágreiningsefna á ári hverju sem sum hver eru flókin úrlausnar. Þar fyrir utan á hún að baki áralanga og fjölbreytta stjórnsýslureynslu, hér á landi sem erlendis. Næst henni kemur *María*, sem var forstöðumaður helstu rannsóknastofnunar á sviði lögfræði hér á landi í nærfellt 14 ár, fyrir utan að sinna öðrum stjórnsýslustörfum þann tíma, auk þess sem hún var um skeið skrifstofustjóri í ráðuneyti. Síðan *Margrét*, sem starfaði um níu ára skeið í ráðuneytum og hjá embætti tollstjóra, auk þess að hafa átt sæti í úrskurðarnefnd innan stjórnsýslunnar. Þar á eftir fylgir *Valborg*, þá jafnt sett *Sigurður* og *Súsanna Björg*, síðan *Bryndís* og loks *Sigríður Rut*.

5.5. *Reynsla af fræðistörfum o.fl.*

5.5.1. *Kennsla á háskólastigi og önnur akademísk störf*

Bryndís Guðmundsdóttir var stundakennari í skaðabótarétti við Háskólann á Bifröst á árunum 2018-2019.

Margrét Gunnlaugsdóttir hefur verið prófdómari í fjölskyldurétti við lagadeild Háskólans í Reykjavík.

María Thejll kenndi kröfurétt sem stundakennari við lagadeild Háskóla Íslands á árunum 2008-2016.

Nanna Magnadóttir var árið 2019 prófdómari í munnlegum prófum við lagadeild Háskóla Íslands.

Sigríður Rut Júlíusdóttir hefur frá árinu 2018 verið stundakennari við lagadeild Háskólans í Reykjavík og séð um kennslu á sérhæfðu námskeiði í höfundarétti, auk þess sem hún hefur haft umsjón með BA- og meistaranáttum við deildina. Hún sinnti stundakennslu í lögfræði við Háskólann á Bifröst 2014-2015 og kenndi á námskeiðum við endurmenntunardeild Old Dominion háskólans í Norfolk 2009-2010. Þá hefur hún um árabíl verið prófdómari á meistarastigi við lagadeild Háskóla Íslands.

Sigurður Jónsson hefur hvorki kennt á háskólastigi né fengist við önnur sambærileg störf.

Súsanna Björg Fróðadóttir hefur hvorki kennt á háskólastigi né fengist við önnur sambærileg störf.

Valborg Steingrímsdóttir var á árunum 2010-2011 stundakennari við lagadeild Háskóla Íslands á þremur námskeiðum á sviði umhverfisréttar.

5.5.1.1. Kennsla á háskólastigi og önnur akademísk störf – samanburður

Samkvæmt framansögðu stendur *Sigríður Rut* fremst á því sviði sem hér um ræðir. Næst henni kemur *María*, þá jafnt settar *Bryndís* og *Valborg* og þar á eftir *Margrét* og *Nanna*, en ekki verður gert upp á milli þeirra tveggja. Sem fyrr segir hafa hvorki *Sigurður* né *Súsanna Björg* fengist við kennslu á háskólastigi eða önnur akademísk störf.

5.5.2. Útgefnar greinar og bækur, ritstjórn o.fl.

Bryndís Guðmundsdóttir tilgreinir hvorki í umsókn sinni greinar eftir sig um lögfræði né annað sem fellur hér undir.

Margrét Gunnlaugsdóttir tilgreinir hvorki í umsókn sinni greinar eftir sig um lögfræði né annað sem fellur hér undir.

María Thejll var ritstjóri ritraðar sem Lagastofnun Háskóla Íslands gaf út með fræðilegum ritgerðum um lögfræðileg efni á árunum 2011-2016.

Nanna Magnadóttir hefur ritað eina óritrýnda grein um lögfræði. Hún var meðritstjóri tímarits Eyrstrasaltsráðsins á árunum 2009-2010. Þá hefur hún flutt fyrirlestra um lögfræðileg efni, hér á landi og erlendis.

Sigríður Rut Júlíusdóttir hefur ritað tvær óritrýndar greinar um lögfræði, þar af aðra með öðrum höfundum, auk þess að hafa samið einn ritrýndan bókarkafla. Einnig hefur hún skrifað tvær stuttar greinar sem birst hafa í Lögmannablaðinu. Þá hefur hún flutt fyrirlestra um lögfræðileg efni við ýmis tækifæri.

Sigurður Jónsson tilgreinir hvorki í umsókn sinni greinar eftir sig um lögfræði né annað sem fellur hér undir.

Súsanna Björg Fróðadóttir tilgreinir hvorki í umsókn sinni greinar eftir sig um lögfræði né annað sem fellur hér undir.

Valborg Steingrímsdóttir hefur ritað tvær fræðigreinar, þar af er önnur ritrýnd grein um lögfræði, en hin þverfræðileg grein sem hún skrifaði ásamt tveimur öðrum þar sem hún samdi kafla um lögfræðilegt efni. Að auki hefur hún haldið tvo fyrirlestra um slík efni.

5.5.2.1. Útgefnar greinar og bækur, ritstjórn o.fl. – samanburður

Í þessum þætti er lagt mat á hæfni umsækjenda á grundvelli fræðiskrifa þeirra, fyrst og fremst fræðigreina. Sumt efnið er ritrýnt, en annað ekki. Þess ber þó að gæta í því sambandi að ekki tíðkaðist að ritrýna greinar sem birtust á árum áður. Við matið er litið til gæða fræðiskrifa og jafnframt til fjölda, umfangs og fjölbreytni þeirra, auk þess sem horft er til þess hvort hlutaðeigandi umsækjandi hafi ritað efnið einn eða í samvinnu við aðra. Þá er loks höfð hliðsjón af fyrirlestrum, sem umsækjendur hafa flutt um lögfræðileg efni, svo og ritstjórnarstörfum þeirra. Síðastnefndu þættirnir eru þó tiltölulega léttvægir í samanburði við útgefið efni.

Að þessu virtu stendur *Sigríður Rut* fremst umsækjenda í þessum þætti mats. Næst henni koma jafnt settar *Nanna* og *Valborg* og síðan *María*. *Bryndís*, *Margrét*,

Sigurður og *Súsanna Björg* hafa sem fyrr greinir ekki fengist við ritstörf eða annað sem fellur undir þennan matsþátt.

5.6. *Reynsla af stjórnun*

Bryndís Guðmundsdóttir hefur rekið lögmannsstofu ásamt öðrum frá árinu 2008.

Margrét Gunnlaugsdóttir hefur rekið lögmannsstofu nánast óslitið frá árinu 2005, ýmist ein eða með öðrum.

María Thejll var skrifstofustjóri í samgönguráðuneytinu á árunum 2000-2002. Hún gegndi starfi forstöðumanns Lagastofnunar Háskóla Íslands 2003-2016, jafnframt því sem hún var um árabíl forstöðumaður tveggja annarra rannsóknastofnana skólans. Þá var hún skrifstofustjóri lagadeildar HÍ 2005-2007.

Nanna Magnadóttir var skrifstofustjóri Héraðsdóms Reykjavíkur um átta mánaða skeið á árinu 2002. Hún var staðgengill forstöðumanns skrifstofu Evrópuráðsins í Kósóvó 2005-2006 og síðar forstöðumaður hennar 2008-2009, en forstöðumaður svæðisáætlunar UNIFEM fyrir Suðaustur-Evrópu 2007-2008. Frá því í ársbyrjun 2014 hefur hún verið forstöðumaður og jafnframt formaður úrskurðarnefndar umhverfis- og auðlindamála.

Sigríður Rut Júlíusdóttir kom að stofnun og hefur staðið að rekstri lögmannsstofu frá árinu 2002. Þá hefur hún setið í stjórn Orkuveitu Reykjavíkur frá 2016 og jafnframt verið formaður starfskjaranefndar hennar.

Sigurður Jónsson hefur stofnað og staðið fyrir rekstri þriggja lögmannsstofa frá árinu 1991. Hann var settur sýslumaður í einn og hálfan mánuð á árinu 1987 og starfsmannastjóri Sláturfélags Suðurlands á Selfossi 1988-1989. Þá var hann formaður yfirúttektarnefndar Árnassýslu árin 1986-1993, stjórnarformaður Eyvindartungu ehf. 2001-2010 og stjórnarformaður Landssamtaka raforkubænda á Íslandi 2005-2010.

Súsanna Björg Fróðadóttir hefur verið formaður Keflavíkurklúbbs Soroptimista á árunum 2017-2019.

Valborg Steingrímsdóttir hefur enn sem komið er ekki öðlast stjórnunarreynslu sem fellur undir þennan þátt.

5.6.1. *Reynsla af stjórnun – samanburður*

Í þessum þætti kemur til skoðunar reynsla umsækjenda af margvíslegum viðfangsefnum, sem eiga það öll sameiginlegt að hafa falið í sér stjórnun í einni eða annarri mynd, enda hafi þess verið getið í umsóknum þeirra. Við mat á hæfni umsækjenda er litið til þess í hverju slík stjórnunarstörf hafa verið fólgin og hve lengi þeir hafa sinnt þeim störfum.

Að því virtu telst *Nanna* standa fremst umsækjenda í þessum matsþætti. Næst henni kemur *María*, þá jafnt sett *Sigríður Rut* og *Sigurður* og síðan *Bryndís* og *Margrét*, en ekki verður gert upp á milli stjórnunarreynslu þeirra tveggja. Reynsla *Súsönnu Bjargar* af stjórnun er mjög takmörkuð í samanburði við þá umsækjendur, sem að framan greinir, og *Valborg* býr sem fyrr segir ekki að starfsreynslu sem fellur undir þennan matsþátt.

5.7. *Reynsla af öðrum störfum sem nýtast dómaraefni o.fl.*

Hér á eftir verða rakin önnur störf og verkefni, sem umsækjendur hafa fengist við og nýtast myndu þeim í dómaraembætti að mati dómnefndar, enda hafi þeirra ekki áður verið getið, svo sem í köflum 5.4. og 5.6.

Bryndís Guðmundsdóttir var alþjóðlegur dómari í fimleikum á árunum 1993-2005 og sat í laganefnd Fimleikasambands Íslands í nokkur ár.

Margrét Gunnlaugsdóttir kom í störfum sínum sem sérfræðingur hjá fjármálaráðuneytinu að undirbúningi lagasetningar. Þá átti hún sæti í stjórn Félags kvenna í lögmenntu á árunum 2006-2010.

María Thejll hafði, í starfi sínu hjá Lagastofnun Háskóla Íslands, yfirumsjón með tveimur þjóðaratkvæðagreiðslum sem fram fóru á árunum 2011 og 2012. Einnig vann hún árið 2016 ásamt öðrum fyrir stofnunina úttekt á framkvæmd gjaldeyriseftirlits Seðlabanka Íslands.

Nanna Magnadóttir kom að því, í starfi sínu sem formaður úrskurðarnefndar umhverfis- og auðlindamála, að semja frumvarp til laga um breyting á lögum nr. 130/2011 um úrskurðarnefndina til að auka skilvirkni hennar. Þá lét hún sem starfsmaður UNIFEM í té álit á drögum að jafnréttislögum Albaníu. Ennfremur hefur

hún verið formaður ráðgefandi hæfnisnefndar við skipun skrifstofustjóra í umhverfis- og auðlindaráðuneytinu.

Sigríður Rut Júlíusdóttir átti á árunum 2006-2008 sæti í laganefnd Lögmannafélags Íslands. Einnig var hún 2012 skipuð í nefnd á vegum umboðsmanns skuldara og Samtaka fjármálafyrirtækja sem skilaði skýrslu um greiningu á gengistryggðum lánum. Árið 2018 var hún skipuð í nefnd af forsætisráðherra um umbætur á löggjöf á sviði tjáningar-, fjölmiðla- og upplýsingafrelsis og skilaði nefndin í samræmi við það af sér drögum að níu frumvörpum til laga eða breytinga á lögum. Þá hefur hún frá 2017 setið í stjórn og fulltrúaráði Innheimtumiðstöðvar réttihafa sem starfar á grundvelli 11. gr. höfundalaga.

Sigurður Jónsson átti á árunum 2003-2008 sæti í kvörtunarnefnd Félags fasteignasala. Þá situr hann í stjórn Landssamtaka landeigenda á Íslandi.

Súsanna Björg Fróðadóttir hefur gegnt ýmsum trúnaðarstörfum fyrir Soroptimistasamtökin á Íslandi, þ. á m. verið formaður laganefndar á vegum þeirra árin 2012-2016.

Valborg Steingrímsdóttir var í stjórn Stéttarfélags lögfræðinga á árunum 2013-2017.

5.7.1. *Reynsla af öðrum störfum sem nýtast dómaraefni o.fl. – samanburður*

Eins og áður greinir koma einungis til álita við mat á hæfni umsækjenda í þessum þætti þau störf, sem ekki hafa verið felld undir aðra matsþætti, svo sem reynslu af stjórnslustörfum eða stjórnun. Ef umsækjandi hefur t.d. komið að samningu lagafrumvarpa sem starfsmaður ráðuneytis vegur það af þeim sökum ekki eins þungt hér og vinna við frumvarpsgerð sem sinnt er meðfram öðru starfi.

Sé litið til starfa umsækjenda, sem falla hér undir, telst *Sigríður Rut* standa fremst umsækjenda á þessu sviði, fyrst og fremst vegna aðkomu hennar að samningu mikilvægra lagafrumvarpa samhliða lögmennsku. Næst henni kemur *Nanna*, þá jafnt settar *Margrét* og *María*, síðan *Sigurður* og loks *Bryndís*, *Súsanna Björg* og *Valborg*, en ekki verður gert upp á milli þeirra þriggja.

5.8. Almenn starfshæfni og andlegt atgerði

Í 3. tölulið 4. gr. reglna nr. 970/2020 segir að við mat á almennri starfshæfni skuli litið til þess hvort umsækjandi hafi sýnt sjálfstæði, óhlutdrægni, frumkvæði og skilvirkni í starfi og hvort hann eigi auðvelt með skilja aðalatriði frá aukaatriðum. Þá kemur fram að umsækjandi skuli hafa góða þekkingu á íslensku máli og eiga auðvelt með að tjá sig í ræðu og riti. Ennfremur er tekið fram í 5. tölulið 4. gr. reglnanna að umsækjandi þurfi að eiga auðvelt með mannleg samskipti, bæði við samstarfsmenn og þá sem erindi eiga við hann. Gerð sé krafa um að af umsækjanda fari gott orð, bæði í fyrri störfum og utan starfa og að reglusemi hans sé í engu ábótavant.

Svo sem áður greinir var m.a. áskilið í auglýsingu um hið lausa dómaraembætti að fram kæmu í umsóknum upplýsingar um tvo fyrrverandi eða núverandi samstarfsmenn eða yfirmenn sem gætu veitt dómnefnd bæði munnlega og skriflega upplýsingar um störf og samstarfshæfni hlutaðeigandi umsækjanda. Þær umsagnir, sem nefndin aflaði hjá þessum umsagnaraðilum um störf umsækjenda og persónulega eiginleika þeirra, voru undantekningalaust jákvæðar í þeirra garð.

Af þessum umsögnum og athugunum nefndarinnar verður ráðið, eins og áður er fram komið, að allir umsækjendur uppfylli þær lágmarkskröfur sem gera verður til starfshæfni héraðsdómara samkvæmt 3. og 5. tölulið 4. gr. reglna nr. 970/2020.

5.9. Sérstök starfshæfni

Í 4. tölulið 4. gr. reglna nr. 970/2020 segir að mikilvægt sé að umsækjandi hafi einkamála- og sakamálaréttarfar á valdi sínu og geti farið að fyrimælum laga um samningu dóma og ritað þá á góðu máli. Hann verður að geta stjórnað þinghöldum af röggsemi og sanngirni og afgreitt þau mál, sem honum eru fengin, bæði fljótt og af öryggi.

5.9.1. Að umsækjandi hafi einkamála- og sakamálaréttarfar á valdi sínu

Hvað þennan þátt hæfnismats varðar hafa umsækjendur greint frá störfum sem geta fallið hér undir. Að mati dómnefndar skiptir einkum máli, þegar lagt er mat á hvort umsækjandi hafi einkamála- og sakamálaréttarfar á valdi sínu, hver sé reynsla hans af dóms- og málflutningsstörfum og hvert sé framlag hans í formi kennslu og

fræðiskrifa á sviði réttarfars sem og aðkoma hans að samningu lagafrumvarpa á því sviði.

Það er álit dómnefndar að allir umsækjendur hafi með störfum sínum öðlast nægilegt vald á réttarfarsreglum til að geta sinnt störfum héraðsdómara. Að því sögðu er það niðurstaða nefndarinnar að *Bryndís Guðmundsdóttir, Margrét Gunnlaugsdóttir, María Thejll, Sigríður Rut Júlíusdóttir* og *Sigurður Jónsson* standi fremst í þessum þætti hæfnismats, en þau eiga öll að baki áralanga reynslu af flutningi mála fyrir dómi á öllum dómstigum. Eru ekki efni til að gera upp á milli þeirra fimm að þessu leyti. Á eftir þeim fylgja jafnt settar *Súsanna Björg Fróðadóttir* og *Valborg Steingrímsdóttir* og síðan *Nanna Magnadóttir*.

5.9.2. *Að umsækjandi geti farið að fyrirmælum laga um samningu dóma, ritað þá á góðu máli og fært viðhlítandi rök fyrir dómsniðurstöðu*

Í 4. gr. reglna nr. 970/2020 er m.a. vísað til þess að umsækjandi um embætti dómara þurfi að hafa til að bera almenna og víðtæka lögfræðilega þekkingu og máli skipti hvort hann hafi sýnt sjálfstæði, óhlutdrægni, frumkvæði og skilvirkni í starfi, svo og hvort hann eigi auðvelt með að skilja aðalatriði frá aukaatriðum. Ennfremur að hann geti farið að fyrirmælum laga um samningu dóma. Eftir því sem umsækjandi hefur tileinkað sér betur þessi atriði, þeim mun færari er hann um að kveða upp dóm eða úrskurð í dómsmáli. Af greinargerðum umsækjanda eða eftir atvikum stjórnslu-úrlausnum hans má m.a. ráða hve vel hann er að sér þegar kemur að því að beita þeim réttarheimildum og skýra þau lög sem við eiga hverju sinni. Af þeim verður ekki síður ályktað hversu auðvelt umsækjandi á með að reifa í stuttu máli og um leið með fullnægjandi hætti málsatvik og ágreiningsefni dómsmáls og komast síðan að vel rökstuddri niðurstöðu um sönnunar- og lagaatriði, sbr. d- og f-liði 1. mgr. 114. gr. laga nr. 91/1991 um meðferð einkamála, sbr. og d-, f- og g-liði 2. mgr. 183. gr. laga nr. 88/2008 um meðferð sakamála.

Í samræmi við þetta hefur dómnefnd lagt sérstakt og rökstutt mat á hæfni hvers og eins umsækjanda á þessu sviði. Hefur það einkum verið gert á grundvelli greinargerða, sem fimm þeirra hafa ritað í munnlega fluttum málum fyrir Hæstarétti, og einn í kærumálum fyrir Landsrétti, svo og stjórnsluúrlausna sem tveir þeirra hafa samið

drög að. Ekki hefur þá aðeins verið horft til þeirra framlaga, sem fylgdu umsóknum umsækjenda, heldur einnig til annarra gagna, sem aðgengileg eru, svo sem heimilt er að gera skv. 3. mgr. 5. gr. reglna nr. 970/2020.

Niðurstaða þessa mats dómnefndar er að *Sigríður Rut Júlíusdóttir* væri færust af umsækjendum til að semja dóma ef hún yrði skipuð héraðsdómari. Er þá einkum horft til fjölbreytni þeirra mála, sem hún hefur flutt fyrir dómi, og greinargerða hennar fyrir Hæstarétti sem sérstaklega var farið yfir samkvæmt framansögðu og bera vitni um að hún ætti auðvelt með að færa góð og gild lögfræðileg rök fyrir niðurstöðum í dómsmálum. Næst Sigríði Rut að því er varðar færni til að semja dóma stendur að mati nefndarinnar *María Thejll*. Því til stuðnings er vísað til fjölpættar reynslu hennar af málflutningsstörfum sem og greinargerða hennar fyrir Hæstarétti sem teknar voru til skoðunar. Aðrir umsækjendur standa þeim tveimur að baki að þessu leyti.

5.9.3. Að umsækjandi geti stjórnað þinghöldum af röggsemi og sanngirni og afgreitt þau mál sem honum eru fengin bæði fljótt og af öryggi

Dómnefnd telur að ályktun um þessi atriði verði einkum dregin af þeim störfum sem umsækjendur hafa gegnt á liðnum árum. Með tilliti til þeirra, svo og af því sem fram kom í viðtölum við umsækjendur, lítur nefndin svo á að þeir séu allir hæfir til að stjórna þinghöldum af röggsemi og sanngirni og muni afgreiða þau mál, sem þeim eru fengin, bæði skjótt og vel. Ekkert er fram komið sem gefur tilefni til að gera upp á milli þeirra að því er þetta varðar.

6. Niðurstaða dómnefndar

Verkefni dómnefndar skv. 1. mgr. 12. gr. laga nr. 50/2016 er að taka afstöðu til þess hverjir umsækjenda séu hæfastir til að gegna þeim tveimur embættum héraðsdómara sem hér er fjallað um. Eins og áður greinir hafa allir umsækjendurnir sótt um annað embættið og sjö af átta þeirra um hitt. Verður tekið mið af þessu í umfjölluninni sem á eftir fer.

Hér að framan hefur verið fjallað sérstaklega um þau sjónarmið sem dómnefnd ber að líta til við störf sín skv. 4. gr. reglna nr. 970/2020. Sjónarmiðin hljóta eðli máls samkvæmt að hafa ólíkt vægi innbyrðis, en ekkert eitt þeirra getur ráðið úrslitum.

Niðurstaða dómnefndar er byggð á heildstæðu og, eftir því sem kostur er, hlutlægu mati á verðleikum umsækjenda og skiptir þar mestu máli að þeir hafi til að bera almenna og víðtæka lögfræðilega menntun, þekkingu og færni. Við mat á því að hve miklu leyti starfsreynsla umsækjenda nýtist í störfum héraðsdómara skiptir mestu máli að þeir búi yfir staðgóðri reynslu af dómstörfum, lögmanns- og málflutningsstörfum og þeim stjórnarsýslustörfum sem lúta að úrlausn ágreiningsmála. Einnig hefur þýðingu hvort þau verkefni, sem umsækjendur hafa fengist við, séu fjölbreytileg, svo sem hvort þeir hafi reynslu af því að beita réttarreglum á ólíkum sviðum lögfræði. Þá vegur reynslan af fyrstu starfsárunum í hverju starfi að öðru jöfnu tiltölulega þyngst í þessu sambandi, þannig að síður er ástæða til að gera upp á milli umsækjenda með langa starfsreynslu að baki. Þótt farsæl starfsreynsla gefi mikilsverðar vísbindingar um hæfni umsækjanda koma önnur atriði ekki síður til álita, þá einkum færni hans við lögfræðilega greiningu á álitamálum sem leysa þarf úr fyrir dómi.

Ef litið er til þeirra matsþátta, sem fjallað er um í köflum 5.1. – 5.8. og 5.9.1., þar sem reynsla af dómstörfum, reynsla af lögmanns- og málflutningsstörfum og reynsla af stjórnarsýslustörfum vega þyngst og hafa jafn mikið vægi, hver þáttur um sig, og þeir virtir í heild er það álit dómnefndar að *Margrét Gunnlaugsdóttir*, *María Thejll*, *Nanna Magnadóttir*, *Sigríður Rut Júlíusdóttir* og *Sigurður Jónsson* standi fremst umsækjenda í þeim matshluta. Í samræmi við það, sem áður hefur komið fram, er þá ekki aðeins litið til þess hve þau störf, sem umsækjendur hafa sinnt, eru fjölbreytt, heldur ekki síður hve verkefni, er þeir hafa fengist við í sama starfi, svo sem starfi lögmanns, eru margbreytileg. Vegna þess að nefndin telur að svo margir umsækjendur standi, þegar á allt er litið, nokkurn veginn jafnt að vígi með tilliti til starfsreynslu, menntunar og annarra þátta, sem fjallað er um í köflunum níu, skiptir enn meira máli en ella þegar lagt er mat á hæfni þeirra til að gegna dómaraembætti að horft sé til mats á færni þeirra til að nýta þá lögfræðiþekkingu, sem þeir búa yfir, við að leysa úr dómsmálum á skipulegan og rökstuddan hátt. Eins og áður greinir er það mat nefndarinnar, sbr. kafla 5.9.2., að *Sigríður Rut* standi fremst umsækjenda í þeim matshluta og næst henni komi *María*.

7.1. Niðurstaða um hæfni umsækjenda um embætti héraðsdómara með fyrsta starfsvettvang hjá Héraðsdómi Reykjavíkur.

Með skírskotun til alls þess, sem áður greinir og fram hefur komið, m.a. í viðtölum við umsækjendur, er það niðurstaðan af heildstæðu mati dómnefndar á hæfni umsækjendanna átta, sem sækja um embætti héraðsdómara með fyrsta starfsvettvang hjá Héraðsdómi Reykjavíkur, að *Sigríður Rut Júlíusdóttir* sé hæfust þeirra.

Sigríður Rut Júlíusdóttir hefur um 20 ára skeið starfað sem lögmaður og lengst af verið einn af eigendum lögmannsstofu er hún stofnaði ásamt öðrum árið 2002. Á þessum tíma hefur hún flutt fjölda viðamikilla mála fyrir dómi, þ. á m. fyrir Hæstarétti og Landsrétti, en hún öðlaðist réttindi til málflutnings fyrir Hæstarétti á árinu 2007. Af öðrum störfum má nefna að hún hefur setið í stjórn Orkuveitu Reykjavíkur frá árinu 2016. Einnig hefur hún setið í höfundaréttarnefnd og höfundaréttarráði frá árinu 2006 og átti sæti í laganefnd Lögmannafélags Íslands 2006-2008. Árið 2018 var hún skipuð í nefnd um úrbætur á löggjöf á sviði tjáningar-, fjölmiðla- og upplýsingafrelsis sem skilaði af sér fjölmörgum lagafrumvörpum. Hún lauk meistaraprófi í lögum (LL.M) frá Stanford-háskóla í Bandaríkjunum árið 2011. Þá hefur hún sinnt stundakennslu á háskólastigi, m.a. við lagadeild Háskólans í Reykjavík og Háskólann á Bifröst. Einnig hefur hún ritað um lögfræði á opinberum vettvangi.

7.2. Niðurstaða um hæfni umsækjenda um embætti héraðsdómara með fyrsta starfsvettvang hjá Héraðsdómi Reykjaness.

Með skírskotun til alls þess, sem áður greinir og fram hefur komið, m.a. í viðtölum við umsækjendur, er það niðurstaðan af heildstæðu mati dómnefndar á hæfni umsækjendanna sjö, sem sækja um embætti héraðsdómara með fyrsta starfsvettvang hjá Héraðsdómi Reykjaness, að *María Thejll* sé hæfust þeirra.

María Thejll hefur í nær 13 ár starfað sem lögmaður, þar af frá árinu 2017 hjá embætti ríkislögmanns. Hún hefur flutt fjölda mála fyrir dómi, þ. á m. vandasöm mál fyrir Landsrétti og Hæstarétti í núverandi starfi sínu, en hún öðlaðist réttindi til málflutnings fyrir Hæstarétti árið 2017. Af öðrum störfum má nefna að hún var skrifstofustjóri í samgönguráðuneytinu á árunum 2000-2002 og síðan árin 2003-2016

forstöðumaður Lagastofnunar Háskóla Íslands, jafnframt því sem hún var forstöðumaður Mannréttindastofnunar HÍ 2005-2016 og gegndi starfi skrifstofustjóra lagadeildar 2005-2007. Ennfremur var hún formaður eftirlitsnefndar með fjárhagslegri endurskipulagningu heimila og fyrirtækja 2009-2012. Hún hefur stundað nám í rekstrar- og viðskiptafræði við Endurmennunarstofnun HÍ og verið stundakennari við lagadeild skólans. Þá var hún um skeið ritstjóri ritraðar sem Lagastofnun HÍ hefur gefið út með fræðilegum ritgerðum um lögfræðileg efni.

Ályktarorð:

Með skírskotun til 1. mgr. 12. gr. laga nr. 50/2016 um dómstóla er það niðurstaða dómnefndar að Sigríður Rut Júlíusdóttir sé hæfust umsækjenda til að hljóta skipun í embætti héraðsdómara með fyrsta starfsvettvang hjá Héraðsdómi Reykjavíkur. Ennfremur að María Thejll sé hæfust umsækjenda til að hljóta skipun í embætti héraðsdómara með fyrsta starfsvettvang hjá Héraðsdómi Reykjaness, sbr. auglýsingu 9. júlí 2021.

Reykjavík, 15. september 2021



Eiríkur Tómasson



Kristín Benediktsdóttir



Óskar Sigurðsson



Ragnheiður Harðardóttir



Sigríður Þorgeirsdóttir